

HEADLINES (EVENING)

Date – 19/07/2024

Time - 18:30 -18:40Hrs

- Governor Dr Hari Babu Kambhampati an hun reilotea Bairabi – Sairang New Line Project zawh turah Rel in a ken tel sumdawwna liantham tak tak awm tur atan inpuahchah tha turin a chah.
- Chief Minister Pu Lalduhoman Special Drawing Facility a sum an puk zauh zauh chu awmze nei, an hlawkpui zawk vanga ti an ni a ti.
- Mizoram tlawha lo zin Agriculture & Farmers’ Welfare changtu Union Minister of State, Bhagirath Choudhary an kum 2029-ah loneitute sum lakluh tun aia a let li a a pun theih nan sorkarin hma a la mek a ti.
- Uttar Pradesh-a Chandigarh Dibrugarh Express rel chesuala thi zat chu pali an tling tawh.

<><><>

GOVERNOR

Governor Dr Hari Babu Kambhampati chuan hun reilotea thawh zawh beisei, Bairabi – Sairang New Line Project chungchangah Northeast Frontier Railway (NFR) Engineer-te Raj Bhavan-ah review meeting a neih pui.

NFR aiawhin Pu Vinod Kumar, Chief Engineer, NFR (Construction) leh a thawhpui Pu Harjimal Meena, Dy CE, NFR, Aizawl te chuan Aizawl kawtkaiia bungrua leh passenger service thlen tur, rel kawng siam mekah hmasawwna an neih te an sawifiah a. He hunah Mipui tana Rail Service a himna turin Relkawng siamna bungrua te labo lo turin ngenna an siam nawn leh a. Rail a rawn luh hunah Relkawng in a tan tlang mipuite chu Rel tlan hun chhunga Relkawng kan lo tur leh hnaih lo tura fimkhur turin an chah bawk.

Governor chuan Rel hian Mizoram leh a thenawm state Assam inkara zin hun a tihtlem bakah, passenger leh bungraw phurh senso nasa taka a tihtlem tur thu a sawi a. Darkar 3 atanga darkar 4 vel lain Mizoram leh Assam inkara zin hun a pawt tawi dawn niin a sawi. Rel hmanga bungraw phurh man nasa taka a hniam dawn avangin Mizoram tan kawng tam takah hmasawwna dang a thlen tur thu a sawi. Governor chuan Mizorama Entrepreneur-te chu Rel in a ken tel sumdawwna liantham tak tak a awm dawn avanga lo inpuahchah tha turin a chah nghal bawk. Report-a tarlan angin, project senso hi ennawn a nih hnuin cheng vbc 8213.72 a ni a, tun dinhmunah hian physical works zaa 93 chu zawhfel a ni tawh. He Rel kawngah hian Station pali a awm a, chungte chu Hortoki, Kawnpui, Mualkhang, leh Sairang te an ni. Bairabi leh Sairang inkar line thar 51.38 Km chu section paliah then a ni a, chungte chu - Bairabi – Hortoki, Hortoki – Kawnpui, Kawnpui – Mualkhang, leh Mualkhang – Sairang te an ni. NFR-in Bairabi – Hortoki section-a trial run hlawhtling tak a lo neih tawh avangin, Hortoki Station hi tun thla chhunga hawn tum niin Mizoramah Hortoki thleng rel a rawn luh tawh dawn a. Kuminah tho hian Hortoki – Kawnpui section leh Kawnpui – Mualkhang section te pawh relin a zawh thei dawn a. Kum 2024 July thla chhungin NFR chuan Sairang Terminal Station hawn a tum a bawk a ni.

<><><>

CM

Chief Minister Pu Lalduhoman Special Drawing Facility a sum an puk zauh zauh chu awmze nei, an hlawkpui zawk vanga ti an ni a ti.

Vawiina Zoram Research Foundation (ZRF) leh Aijal Club tangkawpten Symposium on State Finance: Issues and challenges, Aijal Club-a an buatsaih a hmanpuinaah he thu hi sawiin, Chief Minister chuan an sum pukin sawi zui a hlawh hle tih sawiin, an puk chhan hi a takin Power Bill payment rebate hmu thei tura hun reilote atana an hman hawhna a ni thin, a ti a. Vawiina an dinhmunah inpuhtawn chang awm thin mahse state

dang te nen khaihkhinin bul tan a tlai bik chu a bulpui chu a ni a ti a. Bul hi an tan tlai bik viau naa an thlen chin a sang ve tawh em em zawk a ni, a ti. Leiba a tam a, kumtinin kawng hrang hranga senso mamawh a sang tial tial bawk a. Chuvang chuan sum leh pai an hmuh chhun chhun te fel fai leh daihzai taka hman an tum a, an bei nasa hle tih a sawi a ni.

Chief Minister hian Adviser, OSD leh Consultant, sawrkar sum sen belh mang lova an ruat thu leh sawrkarin a hlawkpui thu pawh sawiin; Chief Minister Office thunei leh chak taka an buatsaih mek thu leh CM office atanga Mizorama project awm zawng zawng uluk taka vil tlat an tum thu a tarlang a ni.

He hun hi Pu Rochamliaana, Secretary, ZRF in a kaihruai a ni.

<><><>

UNION MoS FOR AGRI & FARMERS' WELFARE

Agriculture & Farmers' Welfare changtu Union Minister of State, Bhagirath Choudhary an Mizoram chak takin hma a sawn mek a ti a, kum 2029-ah loneitute sum lakluh tun aia a let li a a pun theih nan sorkarin hma a la mek a ti bawk.

He thu hi vawiina BJP pisa, Aizawla chanchinbumite a kawmnaah Minister chuan a sawi a. Minister chuan PM-Kisan Samman Nidhi hnuaiyah sorkar laipui chuan loneitute sum mamawh a ngaihtuah reng thu a sawi a, lo leh leileta tui mamawh ang tawk an hmu thei lo chu tunhnaia loneitute harsatna lian ber a ni a, loneitute tan tui dahkhawlina tha siamsak chu hmalakna tur pawimawh hmasa a ni a ti.

Minister chuan state sorkarin an dil phawt chuan sorkar laipui chu loneitute mamawh hrang hrang, thlai chi, lei chi leh adangte a rawn pek reng theih thu a sawi a. Mizoram hmasawnnan sorkar laipui chu state sorkar nen kawng hrang hrangin hna an thawk chho dawn a ni a ti a. Mizoram chhunga thlai thar te chu ramdanga thawnchhuah dan tur pawh an ngaihtuah zel tur thu a sawi a ni.

Minister chuan inkalpawhna pawimawh rel kawng leh airport chu a ngaih pawimawh thu a sawi a. Mizoram chuan khualzin te hmanga sum lalut turin theihna sang tak a nei tih sawiin Mizoram hmasawnnan tur sum chu tourism hmang ringawt pawhin tam tak Mizoram a hmuh theih a beisei thu a sawi a ni.

Minister chuan Prime Minister Narendra Modi-a'n Mizoram hmasawnnan tur a ngaihpawimawh thu a sawi a. Mizoram mai ni lo, India ram pumpui chu ram changkang leh hmasawnah kum 2047-ah chuan siam a tum thu a sawi a ni.

<><><>

POWER

Power & Electricity Minister Pu F. Rodingliana hovin chhimlama kawlphepha pek kawnga harsatna hrang hrang leh a chinfel dan tur bialtu MLA-te leh Power & Electricity Department Official-te nen Power Minister Chamber-ah vawiin khan an sawiho a.

He hun kaihruaitu Minister Pu F. Rodingliana chuan ram hmasawnnan turah chuan ramri awm lova a tul dan a zir zela thawhho a tul thu sawiin, Mizoram chhim lama MLA te pawh thawhho pui zel turin a sawm a ni.

He meeting-ah hian Dr. Lorrain Lalpekliana Chinzah, Lawngtlai East bialtu MLA leh Adviser to Chief Minister ni bawk te, Lawngtlai West bialtu MLA Pu C. Ngunlianbunga, Tuichawng bialtu MLA Pu Rasik Mohan Chakma, West Tuipui bialtu MLA Pi Prova Chakma leh Palak bialtu MLA Pu K. Hrahmo te an tel a. MLA te hian an bial chhunga harsatna hrang hrang te an sawi a, P&E Official te nen, Minister kaihruaina hnuaiyah sawihona chipchiar tak neih a ni.

Tunhnaiah chhim lamah power supply a mumal lo hle a; Damdep khua leh a chheh velte phei chuan hun rei tak chhung power an hmuh tawh loh thu sawi lan a ni. He hunah hian Power supply thatlohna chhan leh ti tha tura hmalakna kal mekte sawiho a ni a, fur, leimin leh kawng siamin power line a tihchhiat nasat bakah thawktu

indaihlohna nasa tak avangin a siam hna pawh a muang a, theihtawpa tanlak an tum tih an sawi a ni.

Power Minister Pu F. Rodingliana chuan power-a intodelh tur leh mipuiten power tha taka an hmuh theihna turin Sawrkar-in chak takin hma a lak chhoh mek thu a sawi a. Hemi kawngah hian an hun hlu tak senga bialtu MLA te nen an harsatna leh an ngaih pawimawhte an sawiho theih avangin lawmthu a sawi a; eng hunah pawh inthlahrung lova an mamawh te ama hnenah emaw, bialtu official te hnenah emaw thlen a, fin chhuah zel turin bialtu MLA-te a ngen a ni.



AGRI MINISTER

Ni hnih chung awh tur 'IFAD-FOCUS Mizoram Buyer Seller Meet 2024', Millennium Centre Exhibition Hall, Rooftop-a buatsaih chu vawiin Agriculture and Farmers Welfare Minister Pu PC Vanlalruatan a hawng. He hun hi loneitute'n an thlai thar chhuah leh sawngbawlte awlsam zawka an hralhchhuah theih nana buatsaih a ni.

International Fund for Agricultural Development (IFAD) bultum Fostering Climate Resilient Upland Farming Systems in the North East (FOCUS), Mizoram kaltlanga buatsaih niin, thlai thartu leh leitute indawrtawwna tur a ni a, Minister Pu PC Vanlalruata chuan IFAD-FOCUS Mizoram bultuma Mizoram hmun hrang hranga kuthnathawktute thlai thar chhuah leh sawngbawlte zawrchhuahna remchang buatsaih a ni chu lawmawm a tih thu sawiin, hei hian hmasawwna a entir mai bakah chona thar siamin dinhmun tha zawk min thlen ngei ka beisei a ni, a ti a. Ram sum leh pai dinhmun siamthat nana pawimawh ber leh mipui tam zawkte eizawwna Agriculture sector chawikan kawngah tanrual a ngai a, hemi hi a puitlin theih phawt chuan Agriculture-in nasa takin hma a sawn thei dawn a ni, a ti.

Pu PC Vanlalruata chuan sawhthing, aieng, hmarcha leh hmunphiahte lei turin chak taka hma a lak thu tarlang bawka a ni.

He hunah hian FOCUS Project hnuai District hrang hrang 6 atanga Farmers Interest Group (FIG) leh Entrepreneur, Society leh Farmers Producer Organisation (FPO), thlanchhuah te'n stall 40 chuangah an thlai tharchhuah leh eitur chi hrang hrang sawngbawl sate phochhuakin an zuar chhuak a. Mizoram chhung leh pawn atanga eitur zuar thin leh sawngbawla zuarchhuak thin mi engemawzat he hunah hian telin District hrang hrang atanga thlai thar chhuaktute leh eitur sawngbawl thinte nen insumdawntawwna tha zawk neih a nih theih nan indawrna an kalpui a, ruahmanna an siam a ni.



CRIMINAL LAWS

Mizoram State Legal Services Authority chuan Govt. Zirtiri Residential Science College, Durtlang Leitan-ah ramchhunga dan hman thar, the Three New Criminal Laws chungchang sawifiahna an buatsaih a, he hun hi Gauhati High Court Judge Justice Michael Zothankhuman a hmanpui a ni.

Justice Michael Zothankhuma chuan Zirlaite hnenah New Criminal Laws hriat hi tunlai thalai leh zirlai te chuan an ngaih pawimawh em em tur a ni a ti a, Dan hriat loh hi chhuanlam a tling lo a ni ti in zirlai te a fuih a ni.

MJSPi Julie Lalrinzami, Addl District & Session Judge, Aizawl chuan The Three New Criminal Laws - the Bharatiya Nyaya Sanhita (BNS), the Bharatiya Nagarik Suraksha Sanhita (BNSS), leh Bharatiya Sakshya Adhinyam (BSA) chungchang sawiin, zawhna leh chhanna hun hman a ni bawka.



UP TRAIN ACCIDENT

Uttar Pradesh-a Chandigarh Dibrugarh Express rel chesuala thi zat chu pali an tling tawh a. Vawiin khan rel pindan pakhtah ruang chhar niin hliam tuar pakhat a hliam tuar lovin a thi a. Heti hian rel chesuala thi hi pali an tling tawh a. Hliam tuar hi mi 30 chuang an awm a ni. Thudawn danin rel chetsualna hmun hi Gonda district-a Mankapur

station kiang Gonda-Gorakhpur rel kawngah a ni a. Rel hian a kawng zawh sualin rel pindan 23 zinga 21 chuan kawng hi zawh sualin chetsualna hi a thleng ta nia thudawn a nia. Gonda-a rel chetsual dan chhui tur hian high-level inquiry din nghal a ni a. Railway Ministry chuan mitthi chhungte hnenah cheng nuai 10 ve ve pek anih tur thu a puang nghal a. Rel chetsualna hmunah hian NDRF leh SDRF ten chhanchhuah hna an thawk nghal a ni.

<><><>

BANGLADESH

Bangladesh-a qouta duhloha lungawilote avanga buaina chhuakah mi 39 an thi tawh. Thudawn danin ramchhunga zirlai tam tak ten sawrkar hnaa qouta system chu duhloin lungawilohna an lantir a. Hmun tam takah tharum thawhna thlengin mipuiten harsatna tam tak an tawk a. Inbiakpawhna tam tak a chhiat bakah thuthar thehdarhna hmanrua Television, internet, newspaper website leh social media website te a chhia a. Mobile internet pawh hman theih a ni lo a. Bangladesh Law Minister Anisul Huq chuan zirlaite nena inbiak an inpeih reng thu a sawi a ni.

<><><>

MICROSOFT

Khawvel puma Microsoft chhia avangin ramchhungah pawh mi tam takin buaina an tawk a. Union IT Minister Ashwinin Vaishnaw chuan Microsoft chhiat chhan hi hriat tawh niin a siamthatna tur pawh tihchhuah tawh a ni a ti a. Union Minister chuan National Informatics Centre network a khawih chhe lo niin a sawi.

Indian Computer Emergency Response Team (CERT-In) chuan Microsoft Windows-a chhiatna thleng avang hian mipuite fimkhur turin a chah a ni.

<><><>